

**Jadual padat menanti PM menjelang pertemuan dengan Presiden Biden,  
pemimpin ASEAN  
Astro Awani  
11 Mei 2022  
Bernama**

WASHINGTON DC: Jadual padat menanti Perdana Menteri Datuk Seri Ismail Sabri Yaakob setibanya di sini pada Selasa (Rabu di Malaysia) sebelum menghadiri mesyuarat peringkat tinggi dengan Presiden Amerika Syarikat Joe Biden dan pemimpin ASEAN.

Menteri Luar Datuk Seri Saifuddin Abdullah berkata Perdana Menteri akan menyertai Biden, Naib Presiden AS Kamala Harris dan pemimpin ASEAN lain dalam Sidang Kemuncak Khas ASEAN-AS yang berlangsung selama dua hari di sini bermula Khamis ini (Jumaat di Malaysia).

Kesemua 10 pemimpin ASEAN dijadualkan mengambil bahagian dalam sidang kemuncak khas itu kecuali dari Filipina dan Myanmar.

"Saya difahamkan wakil Myanmar tidak dijemput manakala Presiden Filipina Rodrigo Duterte tidak hadir sebab pilihan raya umum di negaranya," katanya kepada media Malaysia di sini.

Dilaporkan bahawa Jeneral Kanan junta Myanmar Min Aung Hliang tidak dijemput susulan insiden rampasan kuasa di negara itu pada 1 Feb 2021.

Biden akan menghoskan majlis makan malam untuk pemimpin ASEAN di Rumah Putih pada Khamis (Jumaat di Malaysia).

Presiden AS itu dijadualkan bertukar-tukar pandangan mengenai isu serantau dan global dengan pemimpin ASEAN di Jabatan Negara pada Jumaat (Sabtu di Malaysia).

Saifuddin berkata ini adalah Sidang Kemuncak Khas ASEAN-AS kedua yang dihoskan oleh Presiden AS di sini selepas Presiden Barack Obama mengalu-alukan pemimpin ASEAN ke negara itu pada 2016.

- BERNAMA

**© 2022 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/jadual-padat-menanti-pm-menjelang-pertemuan-dengan-presiden-biden-pemimpin-asean-360720>